



PRIMEIRU MINISTRU

DISKURSU HUSI

S. EXA. O PRIMEIRU-MINISTRU

TAUR MATAN RUAK

IHA ENSERAMENTU APREZENTASAUN LEI ORSAMENTU

JERÁL ESTADU (OJE) TINAN 2018 IHA JENERALIDADE

Parlamentu Nasionál, loron 29 fulan-agostu tinan 2018

Sua Exelénsia,

Señór Prezidente Parlamentu Nasionál

Vise-Prezidente Parlamentu Nasionál sira

Sua Exelénsia,

Señora no Señór Deputadu sira

Karu Kolega sira

Señora no Señór membru Governu sira

Señora no Señór sira, Distintu Konvidadu sira

Ho laran ksolok tebes tanba devér ne'ebé kumpri ona mak ami taka apresentasaun iha jeneralidade, proposta kona-ba Lei Orsamentu Jerál Estadu nian ba Tinan Fiskál 2018.

Importante tebtetes atu temi iha ne'e mak entendimentu entre Governu no Distintu Deputada no Deputadu sira husi Parlamentu Nasionál ida-ne'e, relaciona ho nesesidade atu, iha tempu ne'ebé badak tebes, ezekusaun orsamentu Estadu nian filafali ba normalidade, la haree ba opiniaun no ideolojia polítika oin-oin, ne'ebé eziste iha ne'e.

Maske proposta kona-ba OJE tinan 2018 ida-ne'e buka atu fó forma legál ba ezekusaun despeza ne'ebé hala'o ona iha rejime duodesimál husi fulan-janeiru tinan 2018 to'o oras ne'e, ita-nia populasaun sira haree dokumentu ida-ne'e hanesan sinál empeñu, kompromisu, esforsu no dedikasaun nian husi polítiku sira Parlamentu Nasionál ida-ne'e nian, atu normaliza ita-nia país nia situasaun iha planu finanseiru no ekonómiku to'o tinan ida-ne'e nia rohan.

Durante debate iha jeneralidade iha laron tolu nia laran ne'e, importante mós atu verifica katak, Señora Deputada no Señór Deputadu sira iha oportunidade atu bolu atensaun ba Governu atu haree ba aspetu oin-oin ne'ebé, tuir ita-boot sira-nia haree, tenke konsidera ka korrije iha redasaun proposta, ne'ebé iha hela apresiasaun nia laran.

Maibé, tenke hatene katak, elaborasaun proposta kona-ba OJE tinan 2018 nian hala'o iha kondisaun sira ne'ebé susar tanba presiza atu asegura ninia apresentasaun, iha tempu ne'ebé badak tebes, liutiha laron neenulu, hafoin Governu Konstitusionál VIII simu pose.

Dokumentu ne'e urjente tuir ninia justifikasaun, la'ós de'it tanba ita tenke asegura meu finanseiru no orsamentál sira ne'ebé presiza ba prestasaun di'ak servisu públiku nian, maibé mós atu estabelese filafali, lalais, konfiansa iha ita-nia ekonomia, liuliu husi setór privadu ne'ebé depende liu ba investimentu ka despeza Estadu nian.

Justifikasaun seluk ne'ebé halo dokumentu ne'e sai urjente maka nesesidade atu hahú siklu no kalendáriu orsamentál foun ida, iha ne'ebé organizaun no funsionamentu Servisu Públiku sira-nian la'o normál loos ona, atu nune'e bele apresenta, tuir tempu ne'ebé determina ona, proposta ida kona-ba Orsamentu Jerál Estadu nian ba tinan Fiskál 2019, ne'ebé ninia prazu legál sei remata iha laron 15 fulan-outubru tinan 2018 oinmai.

Tanba ne'e, ha'u hakarak agradese ba Señora no Señor Deputadu sira, ba ita-boot sira-nia partisipasaun séria, konstrutiva no empenhu boot durante debate iha jeneralidade iha loron tolu nia laran ne'e, ne'ebé ita hala'o tiha ona.

Ha'u mós hakarak hato'o Governu Konstitusionál VIII ninia vontade firme atu kontinua serbisu ho Parlamentu Nasionál ida-ne'e, iha debate iha especialidade, atu nune'e bele hetan konsensu hirak ne'ebé presiza atu alterasaun sira ne'ebé hatama iha proposta Lei ne'e, bele hatudu kualidade ida-ne'ebé di'ak liután iha versaun finál.

Ami dezeja atu ita bele hamutuk hetan solusaun ida ne'ebé adekuada no nesesária, atu fila-fali lalais ba dalan kreximentu ekonómiku, melloria kondisaun moris ita-nia Povu nian no dezvoltamentu sustentavel husi ita-nia Pátria ne'ebé ita hadomi.

Ba OJE tinan 2018 nian ne'ebé bele hatán ba espetativa lejítima sira husi ita-nia sidadaun sira, ne'ebé hakarak Timor-Leste ida ne'ebé Forte, Riku no Seguru!

Ba Nasaun ida ne'ebé unidu, modernu, dezvoltvidu no moris-di'ak liután!

Maromak haraik bensaun mai ita hotu.

Obrigadu barak ba ita-boot sira-nia atensaun